

## МЕСЯЦА ФЕВРАЛЯ В 24-Й ДЕНЬ.

### ПЕРВОЕ И ВТОРОЕ ОБРЕТЕНИЕ ЧЕСТНЫЯ ГЛАВЫ ПРЕДТЕЧЕВЫ

Аще не есть пост: Вечер поем Блажен муж: 1-й антифон.

На Господи, возвах: стихиры на 6 Глас 5. Аще же пост, стихологисуем обычную кафизму, и поется служба Предтечи с Триодию.

Подобен: Радуйся:

**Р**адуйся, священная главо, и светоносная, \* и Ангелом говейная, \* яже мечем отсечена древле, \* и острыми обличеньми нечистоты студ посекая, \* источник чудес, верная напаяющая, \* и яже Спасово спасительное пришествие возвестившая, \* и наитие Духа древле увидевшая, \* к Сему всельшаяся, \* ветхой же и новой ходатайствовавшая благодати. \* Христа умоли душам нашим даровати велию милость. [Дважды.]

**В** сосуде скудельне сокровенная иногда \* Предтечева глава явися, \* от земных недр издавшаяся явственне \* и чудес струи источающая, \* ибо в водах главу омы, \* превыспренняя ныне покрывающего водами \* и одождяющего человеком Божественное оставление. \* Сию убо ублажим, истинно преславно, \* и в сея обретении радостно празднуем, \* Христа моляще даровати душам нашим велию милость. [Дважды.]

**Г**лава, яже Агнца Божия проповедавшая, \* плотию явльшагося, \* и всем покаяния спасенныя пути Божественными заповедьми известившая, \* яже прежде Иродово законопреступление обличившая \* и сего ради отсечена от телесе, \* и на время подъемшая сокровение, \* якоже светоявленное нам возсия солнце, \* покайтесь – вопиющая – и ко Христу ныне предложитесь во умилении душевнем, \* подающему миру велию милость. [Дважды.]

Слава, глас 6:

**С**окровище Божественных даров, \* Богохраняемая глава твоя, Предтече, \* от земных недр возсия, \* юже мы, верно приемлюще \* и покланяющесе, славне, \* обогащаемся от Тебе, Христов Крестителю, \* чудесы преславными и согрешений прощением.

И ныне, Богородичен:

**К**то Тебе не ублажит, Пресвятая Дево; \* кто ли не воспоет Твоего Пречистаго Рождества; \* безлетно бо от Отца Возсиявый Сын Единородный, \* Тойже от Тебе, Чистыя, пройде, \* неизреченно воплощся: \* естеством Бог сый, \* и естеством быв Человек нас ради, \* не во двою лицу Разделяемый, \* но во Двою Естеству \* неслитно Познаваемый. \* Того моли, Чистая, Всеблаженная, \* помиловатися душам нашим.

Вход. Прокимен дне и чтения.

Пророчества Исаиина чтение (глава 40):

**Т**ако глаголет Господь: утешайте, утешайте люди Моя. Глаголет Бог: священницы, глаголите в сердце Иерусалиму, умолите его, яко умножися смирение его, разрешися бо грех его, яко прият из руки Господни сугуба согрешения своя. Глас вопиющего в пустыни: уготовайте путь Господень, правы творите стези Богу нашему. На гору высокую взыди, благовестуй Сиону, возвышай крепостию глас свой, благовестуй Иерусалиму, вознесите, не бойтесь. Аз Господь Бог, Аз услышу убогих, Израилев, и не оставлю тех. Но отверзу от гор реки и посреде поля

источники, сотворю пустыню в луг и жаждущую землю во источники водныя. Да возвеселится Небо свыше, и облацы да кропят правду, да возсияет земля, и да прозябнет милость, и правда да возсияет вкупе. Глас веселия возвестите, и услышано да будет. Возвестите даже до конец земли, глаголите: яко избави Господь раба Своего Иакова. И аще вжадут в пустыни, источит им воду из камене. Возвеселися, неплоды нераждающая, расторгни и возопий, неболевшая, яко многа чада пустыя паче, нежели имущия мужа.

### Пророчества Малахиина чтение (глава 3):

Такое глаголет Господь Вседержитель: се Аз посылаю Ангела Моего пред Лицем Твоим, иже уготовит путь Твой пред Тобою и приидет во храм Свой Господь, Егоже вы ищите. И кто стерпит день входа Его? занеже тому приити, яко огонь в горниле и якоже былые перуших. И очистит, поядая и очищая, яко серебро и золото. И приидет к вам судом, и будет свидетель скор на лукавья, и на прелюбодейцы, и на кленущияся Именем Моим во лжу, и на лишаяющия мзды наемника, и на насильствующие вдовицы, и пхающия сирья, и на уклоняющия суд пришельца, и на небоящияся его, глаголет Господь Вседержитель. Зане Аз Господь Бог ваш и не изменюся. И вы, сынове Иаковли, уклонистесь от закона и не сохранисте. Сего ради обратитесь ко Мне, и обращуся к вам, глаголет Господь Вседержитель, и ублажат вас вси языцы. И разумеите, яко Аз Господь, смотряий посреди праведнаго и посреди беззаконника в день он, вонже сотворю снабдение любящим Мя. Познайте убо и помяните закон Моисеов, раба Моего, якоже заповеда вам в Хориве ко всему Израилю повеление и оправдание. И се Аз пошлю вам Илию Фесвитянина, прежде даже не приити дню Господню великому и просвещенному, иже направит сердце отца к сыну и сердце человека ко искреннему своему, да не пришед поражу землю вскоре, глаголет Господь Вседержитель, Бог Святыи Израилев.

### Премудрости Соломоновы чтение (главы 4, 5):

Праведник, аще постигнет скончаться, в покои будет. Осудит же праведник умираий живуция нечестивыя. Узрят бо кончину праведнаго и не разумеют, что совещаша о нем, яко повержет Господь нечестивыя безгласны ниц и поколеблет их от оснований, и до последняго исчезнут в болезни и память их погибнет. Приидут бо в помышление согрешений своих ужасни, и обличит их сопротив беззакония их. Тогда станет в дерзновении мнозе праведник пред лицом оскорбивших его и отметающих труды его. Видевше же его, смятутся страхом многим и ужаснутся о преславном спасении его. Рекут бо в себе, кающеся, и в тесноте духа воздохнут и рекут: сей бе, егоже имехом некогда в посмех и в притчу поношения, безумнии. Житие его вменихом неистово и кончину его безчестну. Како вменися в сынех Божиих и во святых жребий его есть? Убо заблудихом от пути истиннаго, и правды свет не облиста нам, и солнце не возсия нам. Беззаконных исполнихомся стезь и погибели, и ходихом стези непроходны, пути же Господня не разумехом.

### На стиховне стихиры, глас 2.

Подобен: Егда от Древа:

Приидите, честную главу, \* отсеченную мечем, Крестителю, \* вернии, днесь почтим, \* во обретении ея сретающе песньми, \* чтуще от любве, благодать проливающую исцелений нам, \* юже безусловящий Ирод древле предъотсече, \* неистовством Иродиаде сплется.

**Стих:** Честна пред Господем \* смерть преподобных Его.

**Я**коже от руды золото, \* тако от земли Предтечева глава просиявает, \* в сосуде скудельнем светящийся и вещающий ясно, \* Иродово обличающий прелюбодейство и убийство, \* зарю же просвещающую помышления наша. \* Юже облобызающе, вернии, днесь почтим песньми, \* яко о нас Богу молящюся.

**Стих:** Праведник, яко финикс, процветет, \* яко кедр, иже в Ливане, умножится.

**Д**ревле, якоже Божественное сокровище \* в сосуде, сокровенная глава Крестителява в земли \* днесь концем открывается, \* якоже богатство проливающая источники исцелений, \* болезни исцеляющая, души просвещающая. \* Темже, утешения всякаго благодать восприемлюще, \* песньми сию благоговейно похвалим.

**Слава, глас 2:**

**Я**коже Божественных умышлений всечестная рака, \* Неизреченнаго Существа ясно провидевшая таинство, глава твоя, \* яко от ложеся матерних, от сокровищ земных днесь возсия, \* Иоанне всехвальне, \* и облаговони всю подсолнечную, освящения проливающая миро, \* и мысленно проповедающая путь покаяния, \* и Спасу всех молящаяся о душах наших.

**И ныне, Богородичен.**

**Тропарь, глас 4:**

**О**т земли возсиявши, Предтечева глава \* лучи испуцает нетления верным исцелений \* свыше собирает множество Ангел, \* доле же созывает человеческий род, \* единогласную возсылати славу Христу Богу.

## НА УТРЕНИ

На Бог Господь: тропарь глас 4:

От земли возсиявши, Предтечева глава \* лучи испускает нетления верным исцелений \* свыше собирает множество Ангел, \* доле же созывает человеческий род, \* единоголасную возсылати славу Христу Богу. [Дважды]

Слава, и ныне, Богородичен глас 4:

Еже от века утаенное, \* и ангелом несведомое таинство: \* Тобою Богородице сущым на земли явился Бог, \* в неслитном соединении воплощаемь, \* и крест волею нас ради восприим, \* имже воскресив первозданного, \* спасе от смерти души наша.

По 1-й стихологии седален, глас 4.

Подобен: Скоро предвари:

Яко Божественное сокровище, сокровено в земли, \* Христос откры главу твою нам, пророче и Предтече: \* вси убо, сошедшеся в сея обретение, \* песньми Богогласными Спаса воспоем, \* спасающаго нашу жизнь молитвами твоими.

Слава, и ныне, Богородичен:

Поем Тя, Богоневесто, Мати Христа Бога, \* славяще Рождество Твое непостижимое, \* имже избавихомся от лести диаволи и всякия беды, Богородице Владычице, \* и верно вопием: \* помилуй стадо Твое, Едина Всепетая.

По 2-й стихологии седален, глас 4.

Подобен: Вознесыйся:

Издавшись, яко золото от руды, \* священная твоя глава преславно \* от незаходимых недр земных, \* обогати верных вся мысли разумением Божественным, \* ныне покайтесь, вопиющи обычно. \* Ейже покланяющися, Предтече, Христа велегласно верою славим.

Слава, и ныне, Богородичен:

Никогдаже премолчим, Богородице, \* благодарно пети от души Твоя милости, Владычице, \* раби Твои, зовуще и глаголюще: \* Пресвятая Дево, предвари \* и избави от враг видимых и невидимых и всякаго прещения, \* Ты бо еси нам заступление.

По полиелеи седален, глас 8.

Подобен: Повеленное тайно:

Крестителева глава крыяшися, яко бисер, в земли влажней \* и, яко свещник Богосветел, украшена, \* озаряет, чудотворящи, мир весь: \* яко утро, возсия всеблаголепно Солнцу Предтеча \* и невечерним светом возвещая паки нам: \* се, – взывая, – Агнец Божий!

Слава, и ныне, Богородичен:

Благодарим Тя присно, Богородице, \* и величаем, Чистая, и покланяемся, \* воспевающе Рождество Твое, Благодатная, вопиюще непрестанно: \* спаси ны, Дево Всемиловитая, яко Благая, \* и демонов исхити словоположения страшнаго в час испытания, \* да не посрамимся, раби Твои.

Степенна, 1-й антифон 4-го гласа.

Прокимен, глас 4: Тамо возрацу рог Давиду, \* уготовах светильник помазанному Моему.

Стих: Помяни, Господи, Давида и всю кротость его.

Всякое дыхание да хвалит Господа.

## Евангелие от Луки, зачало 31.

Во время оно, изыде слово о Иисусе по всей Иудеи, и по всей стране. И возвестиша Иоанну ученицы его о всех сих. И призвав два некая от ученик своих Иоанн, посла ко Иисусу, глаголя: Ты ли еси Грядый, или иного чаем? Пришедша же к Нему мужа, реста: Иоанн Креститель посла нас к Тебе, глаголя: Ты ли еси Грядый, или иного чаем, в Той же час изцели многи от недуг и ран и дух злых и многим слепым дарова прозрение. И отвещав Иисус рече има: шедша возвестита Иоанну, яже видеста и слышаста, яко слепии прозирают, хромии ходят, прокаженнии очищаются, глушии слышат, мертвии востают, нищии благовествуют. И блажен есть, иже аще не соблазнится о Мне. Отшедша же ученикома Иоанновома, начат глаголати к народом о Иоанне: чесо изыдосте в пустыню видети, трость ли ветром колеблему? Но чесо изыдосте видети? Человека ли в мягки ризы одеяна? Се, иже во одежди славней и пици сущии, во царствии суть. Но чесо изыдосте видети? Пророка ли? Ей, глаголю вам, и лишше пророка. Сей бо есть, о немже писано есть: се, Аз пошлю Ангела Моего пред лицом Твоим, иже устроит путь Твой пред Тобою. Глаголю бо вам: болий в рожденных женами пророка Иоанна Крестителя никтоже есть, мний же во Царствии Божии болий его есть. И вси людие слышавше и мытарие оправдиша Бога, крещеся крещением Иоанновым. Фарисее же и законницы совет Божий отвергоша о себе, не крещеся от него.

### По 50-м псалме стихира самогласна, глас 6:

Яже первее на блюде, \* Иродову беззаконную нечистоту обличившая, \* покаяние же всем проповедавшая верным, \* честная глава Крестителя Христова, \* от сокровищ земных являющаяся, преддежит, \* верно притекающим к ней, \* и прикасающимся со страхом, \* и покланяющимся любовию душевною \* дарующая разрешение прегрешений, \* прощением подает потребная и велию милость.

Канон Богородицы со ирмосом на 6 и Предтечи канон на 8. Глас 6.

### Песнь 1

**Ирмос:** Яко по суху, пешествовав Израиль \* по бездне стопами, \* гонителя фараона видя потопляема, \* Богу, победную песнь поим, вопияше.

Грядите, благохвальным языком и всесильным плещуце духом, из устен нечистых глас Слова – Предтечу песньми духовными, вернии, прославим.

Мирным устроением утишается и безмерными множества Христова Церковь благостоятельне упасается, тебе летнюю песнь вопиющи, Предтече.

Юже от Бога даруемую яко сокровище нам неотъемлемо Богоносную главу Предтечеву, вси песньми достойно, сошедшеся, вернии, почтим.

**Богородичен:** Твоего приемши Содетеля, яко Сам восхоте, из безсеменнаго Твоего чрева паче ума воплощаема, Чистая, тварей воистинну явилася еси Владычица.

**Катавасия:** Отверзу уста моя:

### Песнь 3

**Ирмос:** Несть свят, \* якоже Ты, Господи Боже мой, \* вознесый рог верных Твоих, Блаже, \* и утвердивый нас на камени \* исповедания Твоего.

Утроба неплодна прозябение тя изнесе Божественно, яже от язык церковь, славна невестоводца, Христу, истинному Богу и Жениху, сию обручающа.

**Т**воего Боговещанного гласа, Предтече Иоанне, ниже мечем удержана окаянная прелюбодейца: Божественную бо твою нам являеши главу от земли.

**Т**оржествующий светло, желающ тебя град учреждаемъ бывает, яко богатство обретш тайное и источник неоскуден исцелений, Предтече, главу твою.

**Богородичен:** Божественнаго Рождества Твоего, Чистая, всякий естества чин преходит чудо: Бога бо преестественно зачала еси во чреве и, рождши, пребываеши присно Дева.

**Седален, глас 8.**

**Подобен:** Повеленное тайно:

**Я**ко в хранилищи сокровище вложена Предтечева глава храняшеся, \* в водоносе крыющася, глас Слова; \* яко пшеница покровена, во глубине земли изцвете, \* плодоносящи Божественную жизнь. \* Тоя вси почитаем обретение, Христа славяще, \* подавшаго той благодать источити исцеления.

**Слава, и ныне, Богородичен:**

**П**овеленное тайно прием в разуме, \* в крове Иосифове тщанием предста безплотный, глаголя Неискусобрачней: \* приклонивый схождением Небеса вмещается неизменно весь в Тя. \* Егоже и видя в ложеснах Твоих, приемша рабий зрак, \* ужасаюся звати Тебе: \* радуйся, Невесто Невестная.

**Песнь 4**

**Ирмос:** Христос моя сила, \* Бог и Господь, \* честная Церковь, \* Боголепно поет, зывающи, \* от смысла чиста о Господе празднующи.

**В**етхаго был еси печать, всебогате, яже завета, и пророков конец известил еси, и чертогочраситель же Божественный Новаго явился еси, Предтече.

**В**ласяными рубы обычно, Предтече, честную претерпел еси и славную главу твою покрыти царскою багряницею, яко ризою, радуяся.

**Б**ожественную главу твою отбегением нищий и скитаяйся твоими Божественными наставленьми, якоже независтно богатство, Иоанне, показывает.

**З**арею, Предтече, Божественнаго Духа чтущий ты град всегда моли уяснити и Божественней памяти твоей безплотным срадоватися.

**Богородичен:** Мертва мя показа сада вкушение, животное же древо, из Тебе явльшееся, Пречистая, воздвиже и райския пищи наследника мя сотвори.

**Песнь 5**

**Ирмос:** Божиим светом Твоим, Блаже, \* утренующих Ти души любовию озари, молюся, \* Тя ведети, Слове Божий, \* истиннаго Бога, \* от мрака греховнаго зывающа.

**Н**е был еси трость, Крестителю, искусительными злополучения ветры всегда колеблемь, столп же Божественных людей непоколебим, силою бо Илииною явился еси и Духа.

**И**же Божество отменяя, и умаляя славу от Тебе крещшагося Христа, и Божественную благодать твою утаевая, праведно от оград Божественных возбранаемь есть.

**Отверзл** еси независтнаго Божественнаго источника дверь поющим тя любовию, славный Предтече, Божественныя благодати источающия воды и струи исцелений, всех веселящия.

**Богородичен:** Носящи доброту мысленную краснейшия души Твоя, невеста Божия была еси, запечатствованна девством, Чистая, и зарею чистоты мир просвещающия.

### Песнь 6

**Ирмос:** Житейское море, \* воздвигаемое зря \* напастей бурю, \* к тихому пристанищу Твоему притек, вопию Ти: \* возведи от тли живот мой, \* Многомилостиве.

**Пророка** тя рече Истина – Христос, и пророков превышша, Крестителя же и Предтечу Жизни: Того бо узрел еси, Егоже закон и пророцы провозвестиша.

**Не** терпяше крытися чудес источник, сокровище благодати, славная глава твоя, Крестителю, пророче и Предтече, но, явльшися, проливает исцелений источники.

**Всебогато** похваление, и украшение светло, и щит спасителен христоролюбный сей и благославный предлагает град твой, честную и Божественную твою главу, Предтече.

**Богородичен:** Великий прописа во пророцех Моисей Тя, кивот, и трапезу, и свещник, и стамну образне, назнаменуя воплощение, еже из Тебе, Вышняго, Мати Дево.

### Кондак, глас 2.

**Подобен:** Вышних ища:

**Пророче** Божий и Предтече благодати, \* главу твою, яко шипок священнейший, от земли обретше, \* исцеления всегда приемлем, \* ибо паки, якоже прежде, в мире проповедуеши покаяние.

**Икос:** От Господа свидетельство прием, Иоанне, паче всех человек вышший был еси, отонудуже похвалы песней принести тебе ужасаюся, но, любовию понужден, песнь начати дерзнух. Темже да не унедостоиши споспешник мне быти, всехвальне, да возмогу венчати твой верх, святой требогате, ибо ты в мире проповедуеши покаяние.

### Песнь 7

**Ирмос:** Росодательну убо пещь содела Ангел \* преподобным отроком, \* халдеи же опаляющее \* веление Божие мучителя увеща вопити: \* благословен еси, Боже отец наших.

**Девы** прозябение, тя паче всех рече в рожденных женами, яко бо безплотен и равноангелен на земли Тому пожил еси, вопия: благословен еси, Боже отец наших.

**Во** утробе девственной Всельшася познал еси из неплодна чрева и, употребив матерня, Предтече, гласа, играя взывал еси Ему: благословен еси, Боже отец наших.

**От** пустыни, Пресвятым Духом научен, явился еси, якоже утро светоносно, Ангел Света, нас научая вопити: благословен еси, Боже отец наших.

**Ублажися** яко воистинну во градах сей ныне, приснопамятне, стяжавый тя град сокровище, Предтече Христов. Темже, празднуя, вопиет: благословен еси, Боже отец наших.

**Богородичен:** Тобою, Мати Дево, Свет возсия всей вселенной светлый, Ты бо Зиждителя всех родила еси, Бога: у Негоже испроси, Пречистая, нам низпослати верным велию милость.

### Песнь 8

**Ирмос:** Из пламене преподобным росу источил еси \* и праведнаго жертву водою попалил еси: \* вся бо твориши, Христе, токмо еже хотети. \* Тя превозносим во вся веки.

**П**ослан бысть вопиющего глас – Предтеча запустевшим сердцам, Сына Божия веру благочестивую водружаяй, сущаго Бога, Егоже превозносим во вся веки.

**У**готовите, глаголет и ныне Предтеча, Господню стезю: Сей бо святыни ради, пришед, со Отцем и Духом в наша сердца вселится во веки.

**С**лухом убо гласу Родителеву, очима же Божественнаго Духа зрению, всячески же осязанием Иоанн Предтеча, на Тебе руку положивый, Христе, Богоносец бывает.

**И**з чрева освятися Божественным Духом и пророк явися, во чреве носим, ныне же наслаждение иже в недрах тя имущему граду показася, пророче.

**Богородичен:** Златозарный Тя свещник предъизобрази, приемшую неизреченно Свет Непреступный, познанием Того озаряющ всяческая, Егоже превозносим во вся веки.

### Песнь 9

**Ирмос:** Бога \* человеком невозможно видети, \* на Негоже не смеют чини Ангельстии взирати; \* Тобою же, Всечистая, явися человеком \* Слово воплощено, \* егоже величающе, \* с Небесными вои Тя ублажаем.

**Я**ве исполнения десятицы, Предтече, заповедей ты хранитель крепок быв, приличне от Христа почтен был еси дарований десятицею. Темже ты, Духа таинника и друга Слову, ведуще, ублажаем.

**Х**ристов пророк же и апостол, Ангел же и Предтеча, Божественнаго воплощения Креститель, и священник, и мученик верен, проповедник же сущим во аде ты был еси, и девствующим правило, и пустыни прозябение.

**Д**уши неверие обличается священнодейственныхя руки умерщвленныя чудесем, прозябший же паки вере и твоей явльшейся главе, блаженне, пожертая длань обновляется.

**Т**вое явление провозвещающе зрителю, возвещаху Ангельстии чини неложно, Гавриила подобящися Божественному благовещению, еже прежде Рождества твоего священный Захария приемлет.

**Богородичен:** Страстей исцеления да почерпаем, в славный храм Предтечев притекающе: в той бо приходят Ангельстии лица, души же праведных всех, Владычица с Крестителем Иоанном, исцеления подавающе.

### Светилен.

**Подобен:** Учеником:

**С**ветоявленная возсия честная твоя глава от незаходимых недр земных, Предтече Иоанне, \* светильниче Света невещественнаго, \* еяже обретение любовию совершающе, молим тя \* лютых обрести разрешение и время удобне совершити воздержания \* молитвами твоими, всехвальне, Крестителю Спасов.



**Слава, и ныне, Богородичен:**

**У**тешается, Всечистая, верных Богомудрое собрание служащее \* и верно воспевающее Тя, Богородицу истинно. \* Темже молитвами Твоими поста течение даждь нам совершити Боголепно, \* и Кресту Честному поклонитися, и стражем спасительным Сына и Бога Твоего.

**На хвалитех стихиры на 4, глас 4.**

**Подобен: Дал еси знамение:**

**О**тверзе преддверия воздержания \* всечестная глава твоя, всехвальне, \* и пищу предложи сладчайшую всем Божественных дарований, \* ихже причащающесе верно, \* поста терпкое услаждаем, \* и верою восхваляем тя, \* и вопием Христу Богу: \* Иисусе Всесильне, Спасе душ наших.

**М**ира, якоже воды, \* глава искапающеи Предтечева приснотекущая \* и, на трапезе днесь возложшиися тайней и Божественней, \* благоухает мысленно, \* и горесть отгоняет скорбей, \* и веселия вся исполняет любовию зовущия: \* Иисусе Всесильне, Спасе душ наших.

**П**осече глава твоя, якоже меч острейший, \* главы беззаконующих враг \* и исцеления источи в благозаконии сущим всем \* Божественных дарований. \* И сего ради тя верно восхваляем, \* друга и Предтечу, Иоанне, Зиждителява, \* и вопием Ему прилежно: \* Иисусе Всесильне, Спасе душ наших.

**Слава, глас 6:**

**В**сечестную главу Крестителя Твоего, Господи, \* явльшуюся днесь от земли, \* со гласом хваления приемшии верно, \* в молитву, Человеколюбче, грешнии раби Твои приводяще, молимся, \* Тоя ради улучити в день Суда от Тебе очищение и велию милость.

**И ныне, Богородичен:**

**Б**лаголюбивый Боже и Спасе, \* рабы Твоя спасай от всякаго обстояния лютаго \* молитвами Предтечи Твоего и всех святых \* и Матере Твоея мольбами.

**Славословие великое и отпуст.**

## НА ЛИТУРГИИ:

Блаженны от канона, песни 3-я и 6-я.

**У**троба неплодна прозябение тя изнесе Божественно, яже от язык церковь, славна невестоводца, Христу, истинному Богу и Жениху, сию обручающа. [Дважды.]

**Т**воего Божовещанного гласа, Предтече Иоанне, ниже мечем удержа окаянная прелюбодейца: Божественную бо твою нам являеши главу от земли.

**Т**оржествующий светло, желающ тя град учреждаемъ бывает, яко богатство обретш тайное и источник неоскуден исцелений, Предтече, главу твою.

**П**ророка ты рече Истина – Христос, и пророков превышша, Крестителя же и Предтечу Жизни: Того бо узрел еси, Егоже закон и пророцы провозвестиша.

**Н**е терпяше крытися чудес источник, сокровище благодати, славная глава твоя, Крестителю, пророче и Предтече, но, явльшися, проливает исцелений источники.

**Слава:** **В**себогато похваление, и украшение светло, и щит спасителен христоролюбный сей и благославный предлагает град твой, честную и Божественную твою главу, Предтече.

**И ныне: Богородичен:** **В**еликий прописа во пророцех Моисей Ты, кивот, и трапезу, и свещник, и стамну образне, назнаменуя воплощение, еже из Тебе, Вышняго, Мати Дево.

### Тропарь Предтеча, глас 4:

**О**т земли возсиявши, Предтечева глава \* лучи испущает нетления верным исцелений \* свыше собирает множество Ангел, \* доле же созывает человеческий род, \* единогласную возсылати славу Христу Богу.

### Кондак Предтеча, глас 2.

**П**ророче Божий и Предтече благодати, \* главу твою, яко шипок священнейший, от земли обретше, \* исцеления всегда приемлем, \* ибо паки, якоже прежде, в мире проповедуеши покаяние.

**Прокимен, глас 7: Возвеселится праведник О Господе \* и уповает на Него.**

**Стих: Услыши, Боже, глас мой, \* внегда молити ми ся к Тебе.**

### Апостол к Коринфяном, зачало 176.

**Б**ратие, Бог рекий из тмы свету возсияти, иже возсия в сердцах наших, к просвещению разума славы Божия о лица Иисус Христове. Имамы же сокровище сие в скудельных сосудах, да премножество силы будет Божия, а не от нас. Во всем скорбяще, но не стужающе си, нечаеми, но не отчаяваеми, гоними, но не оставляеми, низлагаеми, но не погибающе. Всегда мертвость Господа Иисуса в теле носяще, да и живот Иисусов в теле нашем явится. Присно бо мы живии в смерть предаемся Иисуса ради, да и живот Иисусов явится в мертвенней плоти нашей. Темже смерть убо в нас действует, а живот в вас. Имуще же тойже дух веры, по писанному: веровах, темже возглаголах, и мы веруем, темже и глаголем, ведяще, яко Воздвигий Господа Иисуса, и нас со Иисусом воздвигнет, и предпоставит с вами. Вся бо вас ради, да благодать умножившаяся, множайшими благодарении избыточествит в славу Божию.

Аллилуия, глас 4: Праведник, яко финикс, процветет, яко кедр, иже в Ливане, умножится.

Стих: Истина от земли возсия, \* и правда с Небесе приниче.

#### Евангелие от Матфея, зачало 40.

**В**о время оно, слышав Иоанн во узилици дела Христова, посла два от ученик своих, рече Ему: Ты ли еси Грядый, или иного чаем? И отвещав Иисус рече има: шедша возвестита Иоаннови, яже слышита и видита. Слепии прозирают и хромии ходят, прокаженнии очищаются и глусии слышат, мертвии встают и нищии благовествуют. И блажен есть, иже аще не соблазнится о Мне. Тема же исходящема, начат Иисус народом глаголати о Иоанне: чесо изыдoste в пустыню видети? Трость ли ветром колеблему? Но чесо изыдoste видети? Человека ли в мягки ризы облеченна? Се, иже мягкая носящии, в домех царских суть. Но чесо изыдoste видети? Пророка ли? Ей, глаголю вам, и лишше пророка. Сей бо есть, о немже есть писано: се, Аз посылаю Ангела Моего пред лицом Твоим, иже уготовит путь Твой пред Тобою. Аминь глаголю вам, не воста в рожденных женами болий Иоанна Крестителя, мний же во Царствии Небеснем болий его есть. От дний же Иоанна Крестителя доселе Царствие Небесное нудится, и нуждницы восхищают е. Все бо пророцы и закон до Иоанна прорекоша. И аще хотите прияти, той есть Илия хотяй приити. Имеяй уши слышати да слышит.

Причастен: **В** память вечную будет праведник: